

Obraćanje člana Stalnog izaslanstva Parlamentarne skupštine Bosne i Hercegovine u PSVE Saše Magazinovića na zasjedanju Parlamentarne skupštine Vijeća Europe na temu "Funkcioniranje demokratskih institucija u Bosni i Hercegovini".

Strazbur, 03. listopad 2013.

"Poštovani predsjedniče, drage kolege,

Hvala vam što ste bili tako aktivni na sastancima komiteta i političkih grupa vezano za monitoring izvještaj o Bosni i Hercegovini. Takođe, želim zahvaliti izvjestiteljici, gospođi Woldseth, za njene napore uložene na pokušaju da napravi objektivnu sliku o funkcionisanju demokratskih institucija u Bosni i Hercegovini.

Naziv ovog izvještaja je Funkcionisanje demokratskih institucija u Bosni i Hercegovini , ali kako ja vidim, a što i vi možete vidjeti, većina izvještaja govori o presudi Sejdić - Finci.

Ova presuda je prva presuda u istoriji Suda u Strasbourgu koja zahtijeva promjenu jednog mirovnog sporazuma - Dejtonskog mirovnog sporazuma - čiji je dio Ustav Bosne i Hercegovine.

Smatram pretjeranim i kontraproduktivnim otvaranje vrata sankcijama zbog toga što Aneks IV Dejtonskog mirovnog sporazuma , što znači Ustav BiH , još uvijek nije izmijenjen kako je zahtijevano.

Bio sam jučer u Bruxellesu na razgovorima na visokom nivou o procesu pristupanja, gdje su politički lideri i predstavnici institucija dogovorili i potpisali principe provedbe presude Sejdić i Finci. Gospodin Jagland, naš generalni sekretar je to danas u svom govoru ocijenio pozitivnim, jednako kao i komesar Štefan Fule u svom saopštenju. Mislim da je napravljen korak naprijed u pogledu postizanja konačnog dogovora. Ovaj i svi ostali politički procesi u Bosni i Hercegovini koji se odnose na pristupanje EU neće biti ubrzani ako se usvoji ova Rezolucija. Čak naprotiv, ova Rezolucija, u predloženom obliku, bi mogla usporiti, pa čak i zaustaviti neke od procesa o kojima govorimo.

Ovakav pristup predložen u Rezoluciji neće imati pozitivan rezultat. Takav pristup samo može koristiti onima koji tvrde da Bosna i Hercegovina treba biti podijeljena po etničkim linijama. Samo oni mogu profitirati od loše pozicije BiH u međunarodnim institucijama. Nešto ovakvo bi im dalo novu snagu za separatističke aktivnosti i crtanje novih granica na Balkanu.

Posebno bih želio naglasiti da je čak drugi izvjestitelj za BiH, gospodin Egidijus Vareikis, insistirao nekoliko puta na temi mijenjanja granica moje zemlje na etničkoj osnovi, kao i granica na Balkanu. To je neprihvatljivo i uvredljivo i mislim da bi PSVE trebala jasno reći da to nije politika Vijeća Europe i da ne predstavlja one vrijednosti

Vijeća Evrope za koje se svi zajedno borimo.
Bosna i Hercegovina je multietnička zemlja. To je naše bogatstvo.

Da, tačno je, Bosna i Hercegovina treba međunarodnu pomoć u daljem razvoju i rješavanju ključnih pitanja. Međutim, u isto vrijeme, mi ne želimo biti zemlja u kojoj će oni koji su veliki ili koji misle da su veliki, pokazivati svoju snagu. Trebamo iskrenu i konkretnu podršku.

Ja znam da u ovoj sali ima mnogo onih koji vole moju zemlju, onih koji razumiju političku situaciju, a posebno onih koji žele da Bosna i Hercegovina, što je prije moguće, postane članica EU. Zbog toga vjerujem da će amandmani bosanskohercegovačke delegacije, podržani od velikog broja delegata iz različitih grupa i različitih zemalja, imati vašu podršku.

Hvala vam na pažnji." (kraj)